

**ZAKON**  
**O SUDSKIM TAKSAMA U POSTUPKU PRED SUDOM BOSNE I HERCEGOVINE**  
**(Neslužbeni prečišćeni tekst)<sup>1</sup>**

**I - OPĆE ODREDBE**

**Član 1.**

Ovim zakonom propisuju se sudske takse (u daljem tekstu: taksa) u postupku pred Sudom Bosne i Hercegovine (u daljem tekstu: Sud) i način njihovog plaćanja.

Postupci u kojima se plaća taksa i visina takse za pojedinačne radnje utvrđuju se taksenom tarifom u skladu sa članom 22. ovog zakona.

**Član 2.**

Takseni obaveznik je osoba po čijem prijedlogu ili u čijem interesu se preduzimaju radnje utvrđene ovim zakonom.

Za podneske i zapisnike koji zamjenjuju podneske, takseni obaveznik je osoba koja podnosi, odnosno osoba po čijem se zahtjevu zapisnik sastavlja.

Ako za istu taksu postoje dva ili više obaveznika, njihova obaveza je solidarna.

**Član 3.**

Postupak naplate takse pokreće i vodi Sud po službenoj dužnosti.

**Član 4.**

Ako ovim zakonom nije drugačije propisano, taksena obaveza nastaje:

1. za podneske - u trenutku kada podnesak bude neposredno predat ili zaprimljen kod Suda;

---

<sup>1</sup> Ovaj neslužbeni prečišćeni tekst sadrži: Zakon o sudskim taksama pred Sudom Bosne i Hercegovine ("Službeni glasnik BiH" broj 39/03) i i Zakon o izmjenama i dopuni Zakona sudskim taksama u postupku pred Sudom Bosne i Hercegovine ("Službeni glasnik BiH" broj 77/20) – označeno **podebljanim slovima**.

2. za sudske odluke - kada se stranci ili njenom zastupniku uruči prijepis odluke;
3. za ostale radnje - kad je zatraženo njihovo preduzimanje, odnosno kad Sud počne postupanje.

#### **Član 5.**

Taksa se plaća u trenutku nastanka taksene obaveze, ako ovim zakonom nije drugačije propisano.

#### **Član 6.**

Taksa na presudu u upravnom sporu plaća se samo kad Sud odbije tužbu.

Taksena obaveza iz stava 1. ovog člana dopijeva u roku od 15 dana od dana prijema naloga za plaćanje takse.

#### **Član 7.**

Takse se plaćaju u gotovom novcu.

Vijeće ministara Bosne i Hercegovine (u daljem tekstu: Vijeće ministara) može svojim propisom urediti emitiranje i distribuciju taksenih maraka.

Taksa iz stava 1. ovog člana prihod je Bosne i Hercegovine i plaća se na jedinstveni račun trezora institucija Bosne i Hercegovine.

Potvrda o uplati takse prilaže se uz podnesak za koji je taksa plaćena, a kad se podnosi potvrda o uplaćenju taksi za sudsku odluku, takseni obaveznik dužan je naznačiti broj odluke za koju se taksa plaća.

#### **Član 8.**

**Neplaćena** ili nedovoljno plaćena taksa nije prepreka prijemu podneska niti zadržava tok sudskog postupka.

U slučaju iz stava 1. ovog člana, taksa se naplaćuje na način utvrđen u članu 15. ovog zakona.

#### **Član 9.**

Pravo na naplatu takse zastarijeva u roku od **tri** godine računajući od dana kada je nastala obaveza plaćanja dužne takse.

## **II - OSLOBAĐANJE OD PLAĆANJA TAKSE**

### **Član 10.**

Od plaćanja takse oslobođeni su:

- 1) Bosna i Hercegovina i njene institucije;
- 2) Brčko Distrikt Bosne i Hercegovine, entiteti, kantoni, gradovi i općine i njihovi organi;
- 3) radnici u postupku za ostvarivanje prava po osnovu radnog odnosa;
- 4) humanitarne organizacije;
- 5) građani slabog imovnog stanja;
- 6) strani državljanin i strane države, ako je to predviđeno međunarodnim ugovorom ili pod uslovom reciprociteta;
- 7) ratni vojni invalidi i invalidi civilne žrtve rata, članovi porodica poginulih boraca i članovi porodica poginulih i nestalih civilnih žrtava rata s kojima su poginuli živjeli u zajedničkom domaćinstvu.

Građaninom slabog imovnog stanja u smislu stava 1. tačka 5. ovog člana smatra se samo osoba koja je u sudskom, odnosno upravnom postupku pred nižestepenim sudom, odnosno organom uprave oslobođena od plaćanja takse.

U slučaju sumnje o postojanju reciprociteta iz stava 1. tačka 6. ovog člana, postojanje reciprociteta utvrđuje nadležna institucija Bosne i Hercegovine, po pribavljenom mišljenju Ministarstva pravde Bosne i Hercegovine.

### **Član 11.**

Staralac određene osobe, čije je boravište nepoznato, ili staralac o imovini, čiji je vlasnik nepoznat, kao i od suda postavljeni privremeni zastupnik stranke u postupku, nisu dužni da plaćaju taksu za osobu koju zastupaju.

Naplata ovih taksa vrši se iz imovine osobe koja je zastupana.

### **Član 12.**

Oslobađanje od plaćanja takse koristi samo osoba kojoj je priznato oslobađanje. Kada više osoba zajednički predaju podnesak ili zajednički preduzmu radnju u postupku, a jedna

ili više njih je oslobođena od plaćanja takse, osoba koja nije oslobođena od plaćanja takse dužna je platiti taksu kao da nema oslobođenih osoba.

### **III - POSTUPAK ZA NAPLATU NENAPLAĆENE TAKSE**

#### **Član 13.**

**Ako stranka neposredno ili poštom dostavi Sudu podnesak koji nije taksiran ili je nedovoljno taksiran, Sud će joj dostaviti nalog za plaćanje sudske takse i pozvati je da taksu plati u roku od 15 dana od dana datog naloga te je upozoriti na posljedice neplaćanja takse u tom roku, u smislu člana 15. ovog zakona.**

**Ako stranka iz stava 1. ovog člana kojoj je upućen nalog za plaćanje sudske takse ne plati taksu u ostavljenom roku, Sud je dužan odmah po isteku roka uputiti opomenu za plaćanje sudske takse u roku od osam dana.**

**Sud može, na zahtjev taksenog obveznika, rješenjem odrediti da taksenu obavezu izmiri u ratama, i to u najviše tri mjesečne rate.**

**Ako stranka u postupku ima opunomoćenika, nalog, odnosno opomena za plaćanje takse dostavit će se njenom opunomoćeniku.**

#### **Član 14.**

Kad je taksu dužna da plati fizička osoba koja ima prebivalište u inozemstvu, bez obzira da li je državljanin Bosne i Hercegovine, odnosno pravna osoba sa sjedištem u inozemstvu ili strani državljanin, a taksu nije platila u trenutku nastanka taksene obaveze, Sud će voditi popis neplaćenih taksi i po završenom postupku izdat će nalog za plaćanje takse, s tim da rok za plaćanje takse ne može biti kraći od 30 ni duži od 90 dana.

#### **Član 15.**

**Ako takseni obveznik ni nakon opomene ne uplati taksu u ostavljenom roku, Sud će donijeti rješenje kojim će mu naložiti da u roku od 15 dana od dana prijema rješenja plati dugujuću taksu kao i 50% od te takse na ime kaznene takse.**

**Obrazloženje rješenja iz stava 1. ovog člana sadrži sljedeće podatke:**

- 1) kada je nastala taksena obaveza**
- 2) da li je stranka obaviještena o obavezi uplate takse i na koji način**

- 3) da li je to obavještenje primila
- 4) da li je takseni obveznik upozoren na posljedice neplaćanja takse u roku
- 5) broj bankovnog računa ili drugog računa preko kojeg takseni obveznik ostvaruje prihode, s kojeg se ima naplatiti sudska taksa
- 6) kao i druge bitne činjenice o obavezi uplate takse.

Protiv rješenja Suda iz stava 1. ovog člana dozvoljena je žalba u roku od osam dana od dana prijema rješenja, koja ne odgađa izvršenje rješenja.

U slučaju da takseni obveznik u roku ne uplati taksu po rješenju iz stava 1. ovog člana, taksa će se naplatiti u skladu sa zakonima o izvršnom postupku koje primjenjuju nadležni sudovi koji provode izvršenje.

Rješenje iz stava 1. ovog člana ima snagu izvršne isprave i dostavlja se nadležnom sudu po mjestu prebivališta, odnosno boravišta taksenog obveznika, da provode izvršenje. Uz rješenje, Sud prilaže i dokaz o tome da je taksenom obvezniku dostavljen nalog, odnosno opomena o plaćanju takse.

Sud će biti obaviješten o rezultatima naplate takse prinudnim putem.

#### Član 16.

Ako je takseni obveznik fizičko lice koje nema prebivalište, odnosno boravište, ali ima imovinu u Bosni i Hercegovini, postupak za naplatu neplaćene takse provest će sud na čijem području se nalazi imovina taksenog obveznika, a ako nema imovine, onda sud koji provodi izvršenje na području sjedišta Suda Bosne i Hercegovine.

#### Član 17.

Ako je takseni obaveznik pravna osoba, Sud će rješenjem utvrditi iznos neplaćene takse i kaznene takse i rješenje dostaviti **banci** kod koje se vodi žiroračun taksenog obaveznika radi naplate takse. **Banka u kojoj takseni obveznik ima žiroračun obavijestit će Sud o rezultatima naplate takse prinudnim putem dostavljanjem dokaza o naplati takse.**

#### Član 18.

Ako neplaćena taksa u jednom predmetu iznosi manje od 100 KM, Sud neće preduzimati mjere iz čl. 13. do 17. ovog zakona.

## **IV - POVRAĆAJ TAKSE**

### **Član 19.**

Osoba koja je platila taksu koju nije dužna platiti ili je platila taksu u iznosu većem od propisanog ima pravo na povraćaj takse.

Postupak za povraćaj takse pokreće se na zahtjev stranke, s tim što je Sud dužan da u roku od 30 dana od dana prijema zahtjeva donese rješenje o povraćaju takse.

### **Član 20.**

Pravo na povraćaj takse zastarijeva za dvije godine po isteku godine, računajući od dana kada je nastala taksena obaveza.

### **Član 21.**

Nadzor nad izvršenjem odredbi ovog zakona vrši Ministarstvo finansija i trezora institucija Bosne i Hercegovine.

## **VI - TAKSENA TARIFA**

### **Član 22.**

Takse se plaćaju po sljedećoj tarifi:

#### **I - Parnični postupak**

##### **1. Podnesci**

##### **Tarifni broj 1**

1. Za tužbu, za protutužbu i za prijedlog za ponavljanje postupka plaća se prema vrijednosti predmeta spora sljedeća taksa:

- do 1.000 KM vrijednosti 5% takse,
- do 5.000 KM vrijednosti 4% takse,
- na iznose preko 5.000 KM vrijednosti 3% takse,

a najviše 10.000 KM takse.

2. Za prijedlog za pokušaj poravnanja plaća se polovina takse iz tačke 1. ovog tarifnog broja.
3. Za prijedlog da se dozvoli izvršenje ili obezbjeđenje ili izda privremena mjera, za prijedlog za povraćaj u pređašnje stanje ili za prijedlog za obezbjeđenje dokaza, za odgovor na žalbu ili reviziju, plaća se polovina takse iz tačke 1. ovog tarifnog broja.
4. Za žalbu ili reviziju protiv presude i za žalbu protiv rješenja u sporovima zbog smetanja posjeda, plaća se dvostruka taksa iz tačke 1. ovog tarifnog broja.
5. Za žalbu ili reviziju protiv rješenja plaća se taksa iz tačke 1. ovog tarifnog broja.
6. Za žalbu ili reviziju rješenja, kojim se usvaja ili odbija prijedlog za povraćaj u pređašnje stanje, plaća se polovina takse iz tačke 1. ovog tarifnog broja.

#### NAPOMENA:

1. Za podnesak primljen na zapisnik kod Suda, kao i za podnesak primljen na zapisnik u toku rasprave, plaća se taksa predviđena za odnosni podnesak.
2. Kad je već u tužbi stavljen prijedlog za izdavanje privremene mjere ili kada se u žalbi stavi prijedlog za povraćaj u pređašnje stanje, plaća se pored takse za žalbu i taksa za odnosni prijedlog.
3. Za prijedlog da se dozvoli izvršenje ili obezbjeđenje ili da se izda privremena mjera, odnosno naredba, plaća se jedna taksa i kad se predloži istovremeno ili naknadno više sredstava izvršenja odnosno obezbjeđenja.
4. Ako je u kom od podnesaka navedenih u ovom tarifnom broju stavljen zahtjev za upis u zemljišnu knjigu, neće se naplaćivati taksa predviđena za podnesak, kojim se traži upis u zemljišnu knjigu.
5. Za žalbu protiv prvostepenog rješenja plaća se taksa samo ako se žalbom pobija rješenje koje podliježe plaćanju takse po tarifnom broju 2.
  
6. Za podneske koji nisu navedeni u ovom tarifnom broju, kao i za prijedloge za podneske ne plaća se taksa.

## **2. Odluke**

### **Tarifni broj 2**

1. Za prvostepenu presudu plaća se taksa prema taksenoj osnovici iz tarifnog broja 1.

2. Za presudu zbog izostanka, presudu na osnovu odricanja kao i za presudu na osnovu priznanja plaća se polovina iz takse 1. ovog tarifnog broja.
3. Za rješenje o odbacivanju tužbe plaća se polovina takse iz tačke 1. ovog tarifnog broja, ali ne više od 100 KM.
4. Za rješenje o prijedlogu za dozvolu izvršenja ili obezbjeđenja za rješenje o izdavanju privremene mjere plaća se polovina takse iz tačke 1. ovog tarifnog broja.
5. Za rješenje kojim se usvaja ili odbija prijedlog za povraćaj u pređašnje stanje plaća se polovina takse iz tačke 1. ovog tarifnog broja, ali ne više od 100 KM.

#### **NAPOMENA:**

1. Obaveza plaćanja takse za prvostepenu odluku ne zavisi od toga da li je odluka postala pravosnažna.

## **II - Postupak u upravnim sporovima**

### **1. Podnesci**

#### **Tarifni broj 3**

1. Za tužbu protiv upravnog akta plaća se taksa u iznosu od 100 KM.
2. Za zahtjev za preispitivanje sudskih odluka plaća se taksa u iznosu od 200 KM.
3. Za zahtjev za ponavljanje postupka plaća se taksa u iznosu od 100 KM.

### **2. Odluke**

#### **Tarifni broj 4**

1. Za presudu u upravnom sporu, plaća se taksa u iznosu od 200 KM.



### **III - Posebni slučajevi**

#### **1. Prijepisi**

##### **Tarifni broj 5**

1. Za pismeni ili usmeni zahtjev da se izvrši prepisivanje sudskog akta plaća se taksa u iznosu od 5 KM.
2. Za prepisivanje sudskih akata kao i za prepisivanje akata iz zbirke isprava koje je sud izvršio na zahtjev stranke, plaća se taksa u iznosu od 2 KM od svake započete stranice originala.

### **VII - ZAVRŠNA ODREDBA**

#### **Član 23.**

Ovaj zakon stupa na snagu osmog dana od dana objavljivanja u "Službenom glasniku BiH".

\*

"Službeni glasnik BiH" broj 77/20

#### **Član 7. Stupanje na snagu**

Ovaj zakon stupa na snagu osmog dana od dana objavljivanja u "Službenom glasniku BiH".